

**TALKING POINT**  
**DATO' PROF. DR. ZUL AZHAR ZAHID JAMAL**  
**NAIB CANSELOR**  
**UNIVERSITI MALAYSIA PERLIS**  
**SEMPENA PERJUMPAAN MINGGUAN BERSAMA PENGURUSAN TERTINGGI UNIVERSITI**  
**10 JANUARI 2018**  
**DI KOMPLEKS SUKAN UniMAP, PAUH PUTRA**

Assalamualaikum Warahmatullahi Wabarakatuh  
Salam Satu Malaysia, Salam Negaraku Malaysia - Sehati Sejiwa  
Salam Ilmu, Keikhlasan, Kecemerlangan UniMAP

**SALUTASI**

Yang Berbahagia Timbalan - timbalan Naib Canselor UniMAP  
Yang Berusaha Pegawai -Pegawai Utama Universiti  
Yang Berusaha Penolong Naib Canselor UniMAP,  
Dekan-dekan dan Ketua-ketua Jabatan,

Seterusnya warga Universiti Malaysia Perlis yang saya kasihi sekalian.

**KATA ALU-ALUAN**

1. Alhamdulillah, syukur ke hadrat Allah Azzawajalla kerana kita dapat kembali bertemu di pagi yang berbahagia ini sempena Program Perjumpaan Mingguan Bersama Pengurusan Tertinggi Universiti yang menjadi medan untuk kita bersama-sama pengurusan tertinggi universiti bagi mendengar amanat dan berkongsi maklumat terkini mengenai perjalanan universiti.

2. Setinggi-tinggi terima kasih saya ucapkan kepada seluruh warga UniMAP yang menghadirkan diri pada hari ini kerana masih setia bersama program ini.

Hadirin dan hadirat sekalian

## **INFO PSIKOLOGI**

### **FOKUS, Mencari Kekuatan di Sebalik Kelemahan**

3. Bersempena permulaan tahun baharu 2018 ini, marilah sama-sama kita menghayati kisah pendek ini yang disediakan kaunselor dari Pusat Pengajian Pembangunan Insan dan Teknokomunikasi (iKOM) agar ia boleh dijadikan contoh tauladan dan mengambil iktibar daripadanya.
4. Kisah ini mengenai seorang anak yang setiap hari rajin pergi ke majlis-majlis ilmu berhampiran rumahnya. Suatu hari dia memberitahu ayahnya bahawa dia sudah tidak mahu pergi lagi ke majlis ilmu tersebut. Ayahnya kehairanan lalu bertanya kenapa anak itu berkata sedemikian. Lalu anak itu memberitahu bahawa di majlis ilmu tersebut dia melihat orang-orang yang nampak alim, bijak pandai tetapi sebenarnya tidak, ada antara mereka yang sibuk dengan gadjetnya, sementara yang lain sibuk bercerita mengenai keburukan orang lain.
5. Kata-kata anak itu membuatkan ayahnya berfikir sejenak lalu meminta anaknya mengambil satu gelas penuh air dan membawanya mengelilingi tempat yang diadakan majlis ilmu tersebut. Si anak harus memastikan tiada setitik air pun yang tumpah. Selepas ini, jika anaknya sudah tidak mahu pergi ke majlis ilmu tersebut pun tidak mengapa, terserah kepadanya.

6. Si anak pun membawa segelas air ke mengelilingi tempat tersebut dengan berhati-hati hingga tidak ada setitik air pun yang tumpah. Setelah kembali ke rumah, ayah bertanya kepada anaknya adakah air yang dibawa tersebut ada yang tumpah. Anak itu menjawab tidak ada yang tumpah. Kemudian si Ayah menyoal lagi sama ada di majlis ilmu tadi dia ada melihat orang yang sibuk dengan gadgetnya.
7. Anak itu mengatakan dia tidak tahu kerana pandangannya hanya tertumpu pada gelas yang dibawanya. Ayahnya menyoal lagi sama ada di majlis ilmu tadi dia ada mendengar orang-orang yang sibuk menceritakan keburukan orang lain. Anaknya memberitahu dia tidak mendengar apa-apa kerana memberikan tumpuan menjaga air dalam gelas tersebut.
8. Lalu ayahnya tersenyum dan memberitahu anaknya bahawa dalam kehidupan kita, jika kita fokus kepada tujuan hidup kita, kita tidak akan mempunyai masa untuk menilai keburukan orang lain. Janganlah kita sibuk menilai kualiti orang lain sehinggakan kita lupa mengenai kualiti diri kita.
9. Adakah kita juga begitu? Sering menyalahkan orang lain atas kegagalan kita dalam melakukan pekerjaan sehinggakan kita terlupa untuk melihat dan memperbaiki kelemahan kita seterusnya memantapkan kelebihan yang kita ada.
10. Bagaimanakah caranya? Cubalah melihat kehidupan orang yang lebih susah untuk memberikan kesedaran dan keinsafan pada diri kita. Pergilah melawat rakan-rakan dan ahli keluarga kita yang sedang diuji dengan kesakitan dan kesusahan. Dengan itu, barulah keinsafan itu akan hadir lalu membuatkan kita akan berusaha untuk belajar untuk menghargai kekuatan dan kelebihan yang kita ada.
11. Oleh itu, pada tahun 2018 ini, tetapkanlah apa matlamat yang ingin kita capai. Kemudian terokalah peluang-peluang yang ada untuk kita capai matlamat tersebut, fokus pada matlamat yang kita tetapkan dan berhenti bersangka buruk pada orang di sekeliling kita. InsyaAllah, semoga kita

akan menjadi lebih baik dan lebih bermanfaat untuk diri sendiri, organisasi, masyarakat dan agama. Selamat berkerja!

Hadirin dan hadirat sekalian

### **PROGRAM YANG TELAH BERLANGSUNG**

#### **LoA UniMAP dan MALAYSIAN COMMUNICATIONS AND MULTIMEDIA (MCMC)**

12. Alhamdulillah, sebagai pembuka 2018, pada 4 Januari lalu saya mewakili UniMAP untuk menandatangani satu Letter of awards (LoA) bersama Malaysian Communications and Multimedia (MCMC) bertempat di Majlis menandatangani LoA telah berlangsung di Auditorium MCMC, Cyberjaya.
13. Majlis tersebut bertujuan bagi menerima satu lagi dana penyelidikan di bawah IoT Working Group yang diuruskan oleh Malaysian Technical Standards Forum (MTSFB).
14. Anugerah geran penyelidikan tersebut telah disampaikan kepada ketua penyelidikannya, Dr. Mohd Nazrin Md Isa dari Pusat Pengajian Kejuruteraan Mikroelektronik, Universiti Malaysia Perlis (UniMAP). Projek kolaborasi bersama Masdar Agro Sdn. Bhd. dan Jabatan Pertanian Kedah itu menerima peruntukan geran penyelidikan berjumlah RM87,373.00.
15. Untuk makluman semua, projek penyelidikan bertajuk e-PADI: An IoT-based Paddy Productivity Monitoring and Advisory System yang telah diluluskan oleh urusetia khas MCMC pada 13 SEPTEMBER 2017 bagi sesi 01/2017. Daripada 59 permohonan, lima permohonan diluluskan dengan empat penerima lain, masing-masing daripada Solnovation Analytics Sdn Bhd, Favoriot Sdn Bhd dan Universiti Putra Malaysia (UPM). Turut hadir bersama saya pada majlis tersebut adalah Dekan Pusat Pengajian

Kejuruteraan Mikroelektronik, UniMAP, Professor Madya Ir. Dr. Rizalafande Che Ismail.

16. Setinggi-tinggi tahniah diucapkan kepada PPK Mikroelektronik, saya berharap LoA ini akan menjadi pemangkin kepada semua PPK untuk lebih menyerlah di masa hadapan. InsyaAllah.

Hadirin dan hadirat sekalian,

### **PROGRAM AKAN BERLANGSUNG**

#### **AMANAT MENTERI PENDIDIKAN TINGGI 2018**

17. Untuk makluman semua, esok akan berlangsung Amanat Menteri Pendidikan Tinggi 2018 yang akan disampaikan Yang Berhormat Datuk Seri Idris Jusoh. Saya difahamkan pada amanat kali ini, beliau mengambil kira keperluan dan maklumat yang salurkan oleh masyarakat kepada beliau melalui program TN50 dan komen-komen di media sosial beliau.
18. Marilah kita bersama-sama turut serta mendengar amanat ini bertempat di Dewan Kecemerlangan, Kampus Alam UniMAP Pauh Putra pada jam 9.30 pagi. Kehadiran adalah diwajibkan dan diambilkira sebagai satu (1) hari berkursus.
19. Semoga kita dapat mengambil perhatian atas segala hasrat dan harapan yang akan disampaikan beliau untuk sistem pendidikan tinggi, baik arus akademik atau bidang TVET negara pada tahun ini.

Hadirin dan hadirat sekalian,

#### **MAJLIS SANTAPAN MALAM BERSAMA CANSELOR UniMAP 2018**

20. Untuk makluman semua warga UniMAP, pada 16 Januari ini akan diadakan Majlis Santapan Malam Bersama Canselor UniMAP 2018. Majlis santapan ini diadakan bertujuan bagi mengeratkan hubungan antara ketua jabatan

UniMAP bersama DYTM Tuanku Canselor disamping mendengar idea-idea baharu dalam memacu UniMAP ke peringkat yang lebih tinggi.

21. Selain itu bersempena majlis itu turut diadakan Sambutan Ulangtahun Keputeraan DYTM Tuanku Canselor UniMAP. Marilah kita bersama-sama doakan agar program ini akan berjalan dengan lancar, InsyaAllah.

## **PENUTUP**

22. Rasanya setakat ini saja ucapan saya pada hari ini semoga apa yang dikongsikan akan dapat memberikan manfaat untuk kita semua.

Saya sudahi dengan Wabillahitaufik Walhidayah Wassalamualaikum Warahmatullahi Taala Wabarakatuh.